

Maktubu dənê Jak duwa

Labiya dənê Jak duwa

¹ Əndi gə Jak gaba ala giyə gənê Mǎrĩ duwa me gənê Aba ciri gə Jesu Kris duwa me nê alang 'yeni nare nê nê Mǎrĩ duwa nê cəgədə bam managə səna gəndədə lə ka pad labiya.

Yê gə sii managə wamani-yê

² Chamran, managə mani jiga jiga gərsəng da, kalna sədəng 'ywalnangê diyê naŋ.

³ Anê 'ocŋ com, dusi dan də kala di dwana dəra dwayna mani nê gərsəng də bam da, ha harang gə yê gə sii waya.

⁴ Dəm da, kalna yê dan gə sii waya di hana ladna bəra 'yaŋa-lê ba, dara kal anê kədənê nare nê ladə gə dərêgə bəriŋ nê acna hiŋe kaw ilê sədəngê bədê me mani mən kaw jalnang bədê me ca.

⁵ Gun mən dwarengê dəriŋ naa duwa ina lə naŋ bədê da, kaləw a urnê Mǎrĩ, aŋji ha 'yawê. Dara Mǎrĩ di aŋji 'yagə nare pad mani gə dusi də dwani dəban alaw gə gun gwale.

⁶ Gun gə ta di a urnê gə dusi də kala dəban gaga hiŋe dusəwê bədê, dara aba gaga dusəwê da, wun ya nimi nê kuray-yê nê gale ugə cogə ha nəm kame kame ta de.

⁷ Gun gə ya ta de da, a 'wacnana dara ba ha 'ywa mani hiŋe managə Aba ciri əsəwê bədê.

⁸ Dara an̄ji i gun gə al mani pad gə dusi də sər sər me ur 'wo bərmê mən bêdê.

'Ywa gə mani me, dama gə burgani me

⁹ Kal əjəm chen gə burage da, səm 'ywalnam dara Mǎrĩ asəm sumi gə 'waga dəm.

¹⁰ Me əjəm chen gaba 'ywa mani da, səm 'ywalnam dara Mǎrĩ com dodê me ca. Dara aba 'ywa mani di ha susəgê bam ya chemde ho day de.

¹¹ Dara wala gə dawa ana nañ mwom da, chemde di laa i bam me, ho day susəgə bam me, ladni day cor ilê bêdê. Gun gaba 'ywa mani kaw ha mara bam managə giyê duwa gə ala gaba kanja 'ywa di dalawê yande me ca.

Mani woni gərsê nare me woni lamagə me

¹² Gun gaba yêê səw waya məjag managə mani woni gərsêw dwaṛagəlê da, dam i sii 'yola gə 'yang dalawê. Dara managə an̄ji dwayna wamani di bam mwom da, ha 'ywa kwañe gə i bêlê gaba dama gə dərêw bəriñ gə Mǎrĩ u bəw way dara ba 'yagə nare woni urêw di.

¹³ Gun gə mani lamnaw dara asaw acña-lê da, kaləw a wayna da: «I Mǎrĩ me lamən asən acña-lê an̄ju bêdê.» Dara Mǎrĩ da, mani nê acñe laməw asəw acña-lê bêdê, me an̄ji kaw lam gun ba alna acña bêdê me ca.

¹⁴ Wala gə mani lamna gun asaw acña-lê da i mani nê acñe cende day nê ilê gun dusəwê bəg di me cwarə surəw asnəw acña-lê cendi.

¹⁵ Targiñ dfang da, mani nê acñe cende day nê ilê gun dusəwê di u gudi me yêê acña. Ərə

managə acŋa di jor naŋ mwom da, hara gə made me ca.

¹⁶ Chamran nê nê urgə naŋ, kalna lama sədêng dî.

¹⁷ Mani nê wo pad woni sumi me nê ladə gə dərêgə bəriŋ me da swa i daa Mǎrĩ gaba bwa mani woni acŋa mana di səwê. Mǎrĩ di i gun gə co səw dŋang bêdê me aŋji bi səw bam kaləndə diləmê ya dawa ba də al nəm de bêdê me ca. *

¹⁸ Mǎrĩ di, gə urê duwa aŋju gang, aŋji 'yandə bəlê i gə gwale duwa gə i gwale səw di dara ba də dəbnêng pii managə mani duwa nê aŋji bwagə pad di dərêgəlê.

Dwaya gə gwale, me 'wow ala gə giyê me ca

¹⁹ Chamran nê nê urgə naŋ, 'wacŋana gwale gə ta di: Gun gə woy kaw dwaya gə gwale da a dwayna kalang ma me da, swana kalang wayna gwale bêdê, me kal dusəw swana kalang bêdê me ca.

²⁰ Dara gun dusəw swana mana da, neyem ala gə mani nê lade təba managə Mǎrĩ dərêwê bêdê.

²¹ I dara ta də me, mani pad woni lwabəđang gichəni sədêngê me, mani nê acŋe nê swa dusi də urĩneyê me da, biynê sədêng bam dwaŋagəlê. Yinê gwale gənê Mǎrĩ duwa gə 'yang gandəw dusərêngê ta di gə asa gə dii dodê dara i gwale gə ta di me neyem bəlêng aŋju.

²² Kalna dwaya gə gwale gənê Mǎrĩ duwa gə sumdəng mərə dî, unêw alna gandəw giyê,

* **1:17 1.17** Nê jangə nin yande dara gwale gəndəw gə ɓag gə bii gə Grek ba da: *Dun duwa cor daa ya dənê habde day ba də cogədêr gə dawa ta de bêdê.*

pêgin bêdê da, anê lam i sêdêng dan gang pëgin me ca.

²³ Dara gun gë dwayna gwale di, me unêw alna gë giyê bêdê da, wun i ya gun gë yêr dërêw managë gudëramê ta de.

²⁴ Managë anji yêr dërêw di gudëramê bam pad, me, ændêr ha mwom da, mana gë ta-lê dog anji saw dërêw nê anji yaragë di nëmge bam.

²⁵ Dëm da gun gë kanjê bii gë 'woo gë ladë gë dërêw bëriñ gë kädë gun daa gëndëw ladë me yë sëw woy-yê me dam doy gë sumëw mëra me nëmêw bam bêdê ërë uw al gë giyê me da, gun gë ta di Mãrĩ ha biyê bëw managë giyê duwa gë ala dëwê.

²⁶ Gun wayna ba pam i Mãrĩ tarëw me gamna bëw gaba waya gwale bêdê da, anji lam i sëw duwa anju gë Aba ciri gang. Pama duwa gë Mãrĩ di 'ywala duwa hiñe kaw ilê bêdê bëriñ.

²⁷ Yarna pama gë Mãrĩ gë 'yang gë ladë abrandë gë Mãrĩ dërêwê da, i wagë gë bagondê lê me namde nê wambë lê me managë jiba day-ê me biyê gë sëm bam managë mani nê acñe nê sëña dädê woni lwabam gichëni sëmê dwařagëlê me ca.

2

Piyê gë nare dërêgë.

¹ Chamran 'yêni nê anê kal dusëring managë Aba ciri ënda gaba sumi gë 'waga gë Jesu Kris dëwê da, bamna piyê gë nare dërêgë gë dusi dan dë kala mën bêdê.

² Dwayna, ya gun mən gaba 'ywa mani hurnay barge gaba sumi səwê me kuləm gə kili duwa wom naŋ dunuwê, dəmney nəm dwaŋangê dayara dan-ê me gə mən gə burage gə mani duwa ilê bêdê hurnay barge gə acŋe gə chêbêre səwê, dəmney nəm kərê di me ca da.

³ Mana gə ta də lê da, anê so aləw gaba hura barge gə lade di horəmbê me anê wayəw da: «Əjəm da, hare dam dodê managə lade-yê ka», ərə anê wayəw gə burage gaba 'ywa mani bêdê di əjəm da: «Dəbə dəma daa labaa, hare dam dodê managə səŋa-lê gədəraninê ka.»

⁴ Anê alna ina i ya ta de da, anê pii nare dərêgə me anê kədə i nare woni agə kwanang sariya gə ərmê gə acŋe me ca.

⁵ Dwayna, chamran nê nê urgə naŋ: Mǎŋi aŋjər nare nê burgêdê nê kwandagə yərgə ba i woni 'ywa mani bêdê dara cendi ba kədənê woni 'ywa mani managə dusi day də kala lê me ba 'ywana dwǎŋi dənê Mǎŋi duwa də ba u bəw way ba 'yagə woni urêw di me ca.

⁶ Ərə 'yêni da, anê al nare nê burgêdê woni 'ywa mani bêdê ichiŋ me, woni gəlêng dərêng hara ganang sariya lê da, i woni 'ywa mani di cendi bêdê mo?

⁷ Nare nê ta di i woni waya sumi gə lade gə Mǎŋi 'yang gandəw di gwale duwa gə acŋe di cendi bêdê mo?

⁸ I sədə, anê alna bii gə 'woo gənê Mǎŋi duwa gə dɔy kwanaw bam pad di bəw gə gə jangəw maktubə lê ba da: «Mê ha urê jam gun ya səm dəma de.» Da anê al i mani nê lade 'yang.

⁹ Dəm da anê ina i woni piyê nare dərêgə da anê al i acņa me bii gə 'woo gənê Mǎřĩ duwa di bwang gwale dədêngə dara anê gəŋ bəw bam.

¹⁰ Dara gun alna bii gə 'woo di pad me cêlangəna gə mən daa da anji cêlangə bii gə 'woo gə gəndəw wor pad di daa me ca.

¹¹ I gun gaba waya ba da: «Mê ha ala acņa gə gichəni bêdê ta di», way dang ba da: «Mê ərəm ba mê 'yê gun bêdê me mê cor ha 'yaw», me mê ala acņa gə gichəni bêdê me, mê 'yana gun da, mê cêlangə bii gə 'woo gə gəndəw wor pad di daa.

¹² Gwale dan gə waya me mani dan nê ala me da, kal gəlnê dara banê i nare nê bii gə 'woo gaba kədê nare daa di sanga ba anang sariya anju.

¹³ Dara gun gaba yara jaw ŋagəni duwa bêdê da, wala gə sariya-lê da Mǎřĩ kaw ha alaw sariya dəban yara gə ŋagəni duwa bêdê me ca. Yande da aba yara jaw ŋagəni duwa kaw laŋdə sariya di bêdê bəřin me ca.

Dusi də kala me, mani nê ala me

¹⁴ Chamran, gun wayna gə bəw mərə, ba i aba kala dusəw me alna mani gəlnê nəm bêdê da, dusi də kala də ya ta de di neyem bəlêw mo?

¹⁵ Ya chandərang labaa chidərang 'ywana barge gaba hura bêdê me mani day nê wama inalê bêdê wala gə wala me,

¹⁶ gun mən dwařangê waygə da: «Damna labiya, me kal sədêng uřənê, me wamna əbənê», me dəban 'yagə mani nê wama da 'ywala duwa ilê nalê mo?

¹⁷ Dusi də kala kaw i ya ta de me ca, dusi də kala də dəban mani dərə nê ala da, ya ba də mare bam bəriŋ.

¹⁸ Ga gun mən wayna da: «Əndi da, nê kal i dusən, me əjəm da, mê al i mani me da». Ərə nê ha cwaw wayaw da: «Gələn dusəm də kala də dəban mani dərə nê ala di, me əndi kaw nê ha gələm ni də gə mani dərə nê ala di me ca.»

¹⁹ Əjəm da, mê kal dusəm dara Mǎrǐ ba i mən tenene bêdê mo? Ladə. Dundi nê acne kaw ərəm i yande me cendi laŋa algə me sadə dərêwê.

²⁰ Əjəm mê i gun gə 'ocŋ waya gwale bêdê, mê ur dara 'wacna gə ba dara na me dusi də kala də dəban mani dərə nê ala da ba i də madəri di mo?

²¹ Yər mwagərاندə gə Abraham sən Mǎrǐ yêrêw ba i gun səw gə təba dara mani duwa nê ala di dara aŋji doyəw êw wala gə Mǎrǐ wayəw ba kundə nê gorəndəw gə Isak mana gaba bwasa Mǎrǐ-yê aləw gə Mǎrǐ sarga di bêdê mo?

²² Mê yêr ta da dusi duwa də kala di, me mani dərə nê ala di me dayara daa ca me al gə giyê. I dara mani duwa nê ala di, me dusəw də kala di jor gədə mani sədêgə.

²³ I yande di me gwale gə maktubə dənê Mǎrǐ wayaw dara daraw pii di yala alal dəm, ba da: «Abraham kal dusəw Mǎrǐ dəwê, me gə dusəw də kala də me Mǎrǐ yêrəw ba i gun səw gə lade təba me», mani di yala alal dəm. Ta de me Mǎrǐ 'ogəw ba i jaw mache.

²⁴ Anê yala yêr caga ba Mǎrǐ yêr gun ba i gun gaba ala mani nê təba da, i dara mani duwa nê

ala, i dara dusəw də kala mərə bəđê.

²⁵ Rahab də bəg dədə kanja abje dərə kaw i yande me ca. Măřî yaradə ba i deme sədə də təba dara mani dərə nê ala, wala gə tandi yêê nare nê Israyel nê gə kəjêgə di sədê, me tandi wagəlê dəmê gaba hara lê gə bərmê gə dāng.

²⁶ Ya gun səw gə doni gə hwaya duwa ina lê bəđê da mare, yande kaw, dusi də kala də dəban mani dərə nê ala kaw mare me ca.

3

Gama gə dilesəm

¹ Chamran, kal nare naŋ dwařangê kədənê woni gəlêgə kwandagə mani di, dara anê ocŋ nendə woni gəlêgə kwanandə mani da, Măřî ha alandə sariya waya dwoya kwanandə nê dāng day bam pad.

² Pat ənda lê pad də alang mani nê i gə bərmê day bəđê jiga jiga, gunalna mani nê acŋe managə gwale duwa gə waya lê bəđê da, aŋji i gun gə yə səw gasənani gə neyem yêê səw pad le.

³ Də hurbənağə lemde arjam bədêgəlê dara ba alnandə horəmbê da, sədêgə gə doni pad kaw də i gə dwana lê dəwê me ca.

⁴ Yarnandə bərwa səŋ, aŋji jorna naŋe ya man de me ina i gale gə geche me nwagəřənaw daa ya man de kaw, i gə habda duwa gə bəni yande me gun gaba yêê habda di ha gandəw mana gə dərêw urê.

⁵ Gun dilesəw kaw i yande me ca. Tandi i mani nê bəni yande dəm da, tandi ogə sədə ba də

neyem ala mani nê gechide nan. Ya anê ocñ nəm de, duwa də bani yande kaw neyem ulê kudəmi gə geche bam dəndang.

⁶ Dilese di kaw wun ya duwa de, i ciri də dama də nê acña duwa də hurêlê doni ənda lê, me gawiñ doni ənda pad gə acña. I gə acña gə ta di me, tandi meyendəndə bam yaa əndalê bəra wala ənda 'yaña duwa-lê. Dwana dəra dədə meyanda nare bam ta di swa i managə duwa dədə budê bam bêdê bəriñêlê.

⁷ Gun gə gəsage da, neyem paga mwagne nê bam pad le me dirbi me mani woni nara dodê me, goche nê kuray-yê me ca, mani nê ta di pad da, i gun gə gəsage me, pagəgə anju.

⁸ Dəm da, gun mən tenene kaw neyem paga dilesəw bêdê, tandi i mani nê meyendə mana bam nê gun neyem yidə dodê bêdê. Tandi 'won i gə sam gaba 'ya gun.

⁹ I gə dilesandə di me, də bow gə Aba ciri gə i abrandə di jilay me, i gandədə tandi me, də sərgəng gə nare nê Măĩ bogə wunəw ya anju de dige dige di me ca.

¹⁰ Bədəng gə mən ta di gang me, anê bow gə Măĩ jilay me, bədəng gə mən ta di anê sərgə gə nare me ca, chamran, kal ina yande bêdê.

¹¹ Di mən anê yêr bəla gə cha mən da, nimi duwa 'yol me dən me ca mo?

¹² Chamran, di mən anê yêr dwaga da, neyem ya cwarna mo? Labaa guy neyem ya dwaga mo? Ina yande bêdê da bəla gə nimi duwa dən da, gə ha udê nimi nê 'yole lê bêdê dəm.

Dəriñ naa nê swa daa

¹³ Gun mən dwaṙangê wayna da ba i aba dərêṅ naa me aba 'wacṅa mani me ca da kaləw a gələnê dərīṅ naa ḏuwa di me 'wacṅa duwa di me gə mani nê ala nê lade me gə asa gə dii dodê me ca.

¹⁴ Dəm da, dusi də harni me, də wome me, halgəni me ina lê dusərêṅgê da, kalna 'waga sədêṅg dara ba anê i nare woni dərīṅ naa bêdê me sabna kulagə dərbənê gwale səw di dodê bêdê me ca.

¹⁵ Dərīṅ naa nê ya ta de da, i nê swa Mǎrĩ səwê bêdê, i nê dodê səṅa dədê me i dərīṅ naa nê nê gun gə gəsage duwə me i nêṅ sidan dəra me ca.

¹⁶ Dara managə harni me halgəni me inalê da, mani nê dodê mad mad me nê acṅe nê woy woy kaw ilê me ca.

¹⁷ Dəm da gun gaba dərīṅ naa nê swa Mǎrĩ-yê da pii pa da i gun gə dusəw wusə me i gun gə hara gə labiya me i gun gə həlale me i gun gaba daya nare daa me i gun gaba ərmê jaw me ca. I gun gə al mani nê lade me i gun gə pii nare dərêgə bêdê me i gun gə lway gwale gə bu me dusəw da i jiga me ca.

¹⁸ Nare nê hara gə həlala jwam da, cendi gəsə həlala jwam di managə tulêgəlê cap cap ya gun ba gəsə gə swagê de me dərêgə nê cendi ṅil gə da i mani nê ala nê təba di me ca.

4

Yê gə məlan gə mani nê səṅa dədê ka.

¹ Dama gə gwale me, nasəba me da swa i woy mo? Swa i managə ərmê dan gə acṅe gə ilê jara

ganang dɔban bwagɔ gwayni gɔ dam lɛ sɔdɛngɛ pad ta di.

² Anɛ yɔr mani me dusɔrɛng urgɛle me anɛ 'ywanagɛ bɛdɛ mwom da, anɛ ɛrɛm 'ya gɛ nare. Anɛ al harni me anɛ 'yo mani di bɛdɛ mwom da, anɛ nasɛbɛ gɛ nare me anɛ damɔw gwale me ca. Mani nɛ anɛ urgɛ me anɛ 'yogɛ bɛdɛ ta di, i dara anɛ urgɛ i Mɔrɔ sɔwɛ bɛdɛ.

³ Anɛ urnɛ mani me anɛ 'ywana bɛdɛ da, i dara anɛ ur i gɛ ɛrmɛ gɛ acɛe me mani nɛ anɛ urgɛ ta di anɛ ur i dara meyandagɛ bam pɛginɔ managɛ mani dan nɛ dɛrɛng urɛ.

⁴ 'Yeni nare woni dɛbɛ Mɔrɔ tarɔwɛ jang bɛdɛ nɛ ga! Anɛ 'ocɔnɔ dara urɛ gɛ mani nɛ sɛɔa dɛdɛ ka naɔ mɛra da, i ala gɛ maɔande gɛ Mɔrɔ bɛdɛ mo? Gun gɛ urnɛ mani nɛ sɛɔa dɛdɛ ka naɔ mɛra da, anɔi gɛdɛ i Mɔrɔ aba maɔande duwa.

⁵ Anɛ ɛrɛm dara gwale gɛ maktubɛ wayɔw pad ta di i pɛginɔ ba: Dundi dɛ Mɔrɔ chɛndɛ gandɛdɛ sɛdɛndɛlɛ ta di anɔi al halgɛni dɛra naɛe dara ba damnalɛ jang.

⁶ Ɛrɛ, Mɔrɔ al ganandɛ dusi dɛ lade naɔ dɛng dɔy bam dara maktubɛ way da: «*Woni gwaba jwargagɛ da, Mɔrɔ cogɛ tarɔw me woni asa dɛdɛgɛ dodɛ da, anɔi al gandagɛ dusi dɛ lade me ca.*»

⁷ Kalna Mɔrɔ me ina dole dan anɔu me dɛbɛnɔw sidan wayna da, anɔi ha wa hara bam hiɔ sɛdɛngɛ

⁸ Chɛdne hane Mɔrɔ sɔwɛ ib me anɔi kaw ha chidɛ sɛdɛngɛ me ca. 'Yeni woni ala acɛa da, biynɛ sɛdɛngɛ bam acɛa-lɛ, me 'yeni nɛ dusɔrɛng

sər sər da, kalna dusərêng wusənê le me ca.

⁹ Alna ñagəniyê wamani dan dəwê me nulnê gura me, kalna baya dan di cwarna gədənê gura me sii 'ywala dan di cwarna gədənê ñagəni me ca.

¹⁰ Hurbəna dədêng dodê Aba ciri dərêwê me anji ha cwara yibêng dədêng di daa sən me ca.

Waya gə chênəm gwale duwa gə acne

¹¹ Chamran, kalna waya kwanang gwale day gə acne dī, aba waya jaw gwale duwa gə acne me aw sariya de me da, anji way i biy gə 'wo gwale duwa gə acne me aw i sariya me caag da, mê anaw biy gə 'wo sariya mwom da, mê i aba lanaw bêdê dəm.

¹² I Mārī mən tenene me 'yandə biy gə 'wo di me a sariya anju me. I anju mən tenene me neyem bəlê gun me meyendaw bam me ca. Dəm da, əjəm da, mê i wi me mê aw jam gun sariya mo?

Kalna gwaba gə jwargang dī

¹³ Caga da, dwayna gwale ni, 'yêni woni waya da: «Laba labaa sanga da, nê ha nin hara ciri də geche də yandeyê nê ha nin dama lê ala aliya mən, nê ha nin ala kenge me nê ha nin 'ywa gursə.»

¹⁴ Mani nê ha alang sanga da, anê 'wocnêgə mənang kaw mo me bəlê dan da ha wunê man me mo? 'Yeni da, anê wun ya masəm gə dəmê bani hiñe me bam da, nol bam kalang ta de.

¹⁵ Gwale gə de anê ha wayaw di i ya ta de: Aba ciri urnê da, də ha damang dərêndə bəra, də ha

dama ala mani nê ya ka de me, nê ya ta de me ca.

¹⁶ Ərə caga da, anê 'ogə sədêng 'yêni me anê gwobə jwargang me, 'waga gə sii gə ya ta de da, acn nañe.

¹⁷ Dəm da, gun gə 'wacnana ala gə ladni me alnaw bêdê da, al i acna gə geche.

5

Gəsêni gə 'yagə nare woni 'ywa mani.

¹ Dwayna gwale gə nê wayang 'yeni woni 'ywa mani di, bwana gura me, nulbənê sədêgə me dara wamani gə bedangê di.

² Mani dan nê 'ywa di meyendə bam me barge dan kaw dəgəne law bam me ca.

³ Jəndar dan me gursə dan me kaw marəw yigə bam, marəw gə ta di, ha biyê sandərang Māri dərêwê dara ba anê al mani nê acne, me ha ulê doni dan gə sədêng bam ya duwa de me ca. Dara anê dajəba mani nê 'ywa wala gə so ka ha pii gə ilê 'yaña-lê di.

⁴ Nare woni nilê swagê managə yiga dan-ê kaw, anê 'yogəgə gursə day gə bərmê duwa bêdê. Dwayna nulê day gə cendi nul dara darang di sən, nulê gənê nare woni nilê swagê day di nəm yaa əndara managə Aba ciri gə Māri gə dwana pad i əsêwê di suməwê.

⁵ Anê dam dodê səna lê ka, mana gə ladəbeyê me mani nê dərêng urgə me anê ənbə al swani ya mani nê paga nê gə ha gandagə dara kunbêgə bam de.

⁶ Nare woni ala mani nê tæba da, anê bogø gwale dædêgælê me anê 'yêgø bam me ca kaw, cendi tiŋ bødêgø way gwale bêdê.

'Wo gø di bam wamani-yê

⁷ Chamran, unê dædêng bam bæra Aba ciri cwara duwa lê ba. Yarna aba yiga søn, anji u dæw bam bæra bedø gø sønna duwa dæ anji yigædø di ba nanaw swagê ladna. Anji ugø swagê di dæw bam bæra bedø gø Mǎrĩ gaba 'wa dæriŋ nê pii-yê me gø targønê me ca.

⁸ 'Yeni kaw unê dædêng bam me yinê dusêrêng waynale dara cwara gønê Aba ciri duwa da, wor i ib døn døm.

⁹ Kalna nulbê gø kwanang gwale day dī, chamran, dara sanga kaw kal Mǎrĩ anang sariya bêdê me ca. Yarna aba agø nare sariya di yala dæbæ lê kulø bæwê ib døm, anji ha dømê i kulê.

¹⁰ Chamran, kalna dusêrêng gunêng managø woni waya Mǎrĩ bu nê pii nê way gwale gø sumæw di dædêgælê søn. Cendi 'wo dædêgø bam managø jiba day-ê me 'yeni kawalna yande me ca.

¹¹ Sii 'ywala di i dara nare nê tanga pii woni 'wo dædêgø bam ya ta de di day. Anê doy mana dænê Job duwa me yêê duwa gø søw managø wamani gø 'yow dalawê me mani nê Aba ciri gø Mǎrĩ al gandæw di me ca, bêdê mo. Dara Aba ciri gø Mǎrĩ da, i gun gø dusæw ladø nanæ me dærêw 'yêngøw gun dæwê me ca.

¹² Chamran, pii pa da, kalna særgø sædêng gø daa bêdê me gø sønna bêdê me gø mani nê dæng bêdê me ca. Gwale dan gø anê wayæw di: ina i

«êw» le i êw, ina i «bêdê» le i bêdê me ca, dara kal anê bwarna managə sariya dənê Mǎřĩ duwa lê bêdê me ca.

Amsa gə Mǎřĩ dara woni mwom

¹³ Gun mən managə dwarangê wamani 'ywawe mo? A amsəna Mǎřĩ me gə đang dam 'ywalalê mo? A tunê diri bwanaw gə Mǎřĩ jilay me ca.

¹⁴ Gun mən managə dwarangê mwom aləwe mo? A 'wagəna nare woni dəbê nare nənê Mǎřĩ nê dayar mana mən dərêgəlê amsənaw Mǎřĩ dəwê me kwogədənaw swani dəwê me gə Aba ciri suməw.

¹⁵ Amsa gə Mǎřĩ gə dusi də kala da, ha swa aba mwom di i daa me Aba ciri gə Mǎřĩ kaw ha 'yaw labiya me ha kala dusəw həlala managə acna duwa dəwê me ca.

¹⁶ Wayna acna dan gəndəw daa, daa, managə dwarangê me gun gə woy kaw amsəna Mǎřĩ dara jaw me dara kal anê 'ywana labiya. Dara gun gaba ala mani gə bərmê duwa təba da, amsa duwa di dwana duwa ilê naŋe.

¹⁷ Abe gə gə 'ogəw Eli da i gun gə wun ya nendə de me anji amsa Mǎřĩ gə dwana dara Mǎřĩ ba 'wana bêdê me Mǎřĩ di 'wo bêdê al aliya subu gə durə kubi.

¹⁸ Managə ta lê da anji cor amsa Mǎřĩ ba 'wana bi, ərə Mǎřĩ di 'wo me swagê kaw dəm me naa sənə dədê me ca.

¹⁹ Chamran, gun dan mən dwarangê nwalna bərmê gənê gwale səw di bam me jaw gə đang walnaw cwanaw bi da.

²⁰ Kalna dusêrêng gunêng gwale gə ta di dəwê, gun gə cwanay aba ala acña gə nol bam di bi managə bərmê gə lade-yê da, anji ha bələw i daa made əsədəlê me Mârî kaw ha kala dusəw həlala managə acña duwa gə nañ di dəwê me ca.

Magtubu dənê Mǎĩ
Somrai: Magtubu dənê Mǎĩ (New Testament+)

copyright © 2020 Wycliffe Bible Translators, Inc.

Language: (Somrai)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

709a9ed4-78c1-5393-bf98-819ac0f1bbbc